

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

DARIPADA : DATUK ROZMAN BIN ISLI [LABUAN]

TARIKH : 10 JULAI 2019 (RABU)

SOALAN

Datuk Rozman bin Isli [Labuan] minta **MENTERI WILAYAH PERSEKUTUAN** menyatakan adakah menteri sedar bahawa banyak bangunan dan infrastruktur di Labuan memerlukan peruntukkan yang cukup untuk penyelenggaraan dan pembinaan baru seperti di Botanical Garden, Seasport Centre, Jambatan Konkrit Patau-Patau 1 dan kampung Air lain, Restoran Anjung Ketam, Marina Awam, Balairaya dan lain-lain. Apakah perancangan Kementerian dalam menangani situasi ini dalam RMK-12.

NO. SOALAN : 17

Tuan Yang di-Pertua,

Untuk makluman Yang Berhormat Labuan, isu penyelenggaraan bangunan serta kemudahan awam di Wilayah Persekutuan Labuan telah lama menjadi perhatian dan keutamaan Kementerian Wilayah Persekutuan. Pada 28 Oktober 2018 sempena lawatan ke Labuan, saya telahpun diberi taklimat secara menyeluruh berkenaan pembangunan serta isu-isu semasa yang perlu ditangani.

Antara isu yang dibangkitkan dan dianggap perlu diberi keutamaan ialah keadaan sebahagian besar bangunan awam seperti Bangunan Terminal

NO. SOALAN : 17

Feri Penumpang Antarabangsa Labuan, Kompleks Sukan Laut Antarabangsa Labuan, Marina Awam dan Taman Botanikal Labuan. Selain itu, kemudahan infrastruktur awam seperti Jambatan Kampung Air dan Jalan Kampung yang usang juga diberi penekanan.

Oleh yang demikian, beberapa siri lawatan Turun Padang (TUPA) ke WP Labuan telah dibuat bagi melihat dan meneliti lebih dekat tentang isu yang dibangkitkan. Sebagai contohnya pada 15 Februari yang lalu saya telah melawat seterusnya meneliti Bangunan Terminal Feri Penumpang Antarabangsa Labuan dan pada 28 April pula saya berkesempatan melawat bangunan Kompleks Sukan Laut Antarabangsa Labuan. Hasil daripada siri lawatan tersebut, saya juga telah mengarahkan Perbadanan Labuan untuk menyenaraikan keutamaan projek-projek penyelenggaraan beserta kos yang perlu ditanggung bagi tujuan penyaluran peruntukan Kerajaan.

Untuk makluman Yang Berhormat Labuan, bagi tahun 2019, sejumlah RM8.08 juta telah diluluskan oleh Kerajaan bagi tujuan penyelenggaraan melalui Dasar Sedia Ada, Dasar Baru, *One Off* dan MARRIS. Peruntukan ini telah meningkat sejumlah RM2 juta berbanding tahun 2018 iaitu sebanyak RM6 juta. Walau bagaimanapun, jumlah tersebut masih belum mencukupi bagi menampung kos penyelenggaraan yang meliputi penyelenggaraan jalanraya, bangunan pejabat, bangunan kediaman, bangunan awam, kenderaan dan lain-lain.

Walaupun bagaimanapun, sehingga bulan Mei 2019 jumlah peruntukan yang telah dibelanjakan untuk penyelenggaraan kemudahan awam sepertimana Yang Berhormat sebutkan adalah seperti berikut:

- | | |
|--------------------------------------|-------------------|
| i. Taman Botanikal | : RM91,000.00; |
| ii. Kompleks Sukan Laut Antarabangsa | : RM120,000.00; |
| iii. Restoran Anjung Ketam | : RM5,000.00; dan |
| iv. Marina Awam | : RM45,000.00. |

NO. SOALAN : 17

Bagi tujuan projek infrastruktur awam pula, sejumlah RM2.2 juta telah disalurkan kepada Labuan melalui Peruntukan Pemberian Khas Wilayah Persekutuan pada bulan April yang lalu. Peruntukan ini disalurkan untuk melaksanakan kerja-kerja penyelenggaraan, pembinaan jalan dan jambatan kayu kampung air. Sebagai perancangan masa hadapan, Perbadanan Labuan akan memohon sejumlah RM4.95 juta di bawah RMKe-12 untuk tujuan melaksanakan kerja-kerja membaikpulih cerucuk jambatan konkrit Kampung Air Patau-Patau 1.

Di bawah RMKe-12 juga, Perbadanan Labuan akan menyelesaikan beberapa isu berkenaan tapak balai raya di beberapa buah kampung iaitu Kg. Kerupang/Nagalang dan Kg. Batu Arang selain menyelesaikan isu tapak di atas tanah milik individu di Balai Raya Kg. Bukit Kuda. Manakala untuk Bangunan Anjung Ketam di Kampung Tanjung Aru, pihak Perbadanan Labuan dalam proses penelitian untuk menyerahkan bangunan tersebut kepada para pengusaha supaya mereka lebih bebas untuk mengembangkan perniagaan mereka sementara itu PL tidak lagi terikat dalam melaksanakan penyelenggaraan bangunan.

Sebahagian besar bangunan awam yang dimaksudkan telahpun mencapai usia hampir 20 tahun. Ini bermakna, penyelenggaraan berskala *minor* tidak lagi sesuai untuk membaikpulih kerosakan yang melibatkan struktur dan komponen utama bangunan. Oleh yang demikian, satu jumlah peruntukan secara *one off* diperlukan bagi melaksanakan pembaikan secara menyeluruh.

Bagi tujuan tersebut, dalam RMKe-12 Perbadanan Labuan akan menyenaraikan bangunan yang dimaksudkan untuk dibuat permohonan peruntukan secara berperingkat dalam tempoh 5 tahun. Pemilihan projek penyelenggaraan secara *one off* ini akan diteruskan dari semasa ke semasa mengikut keutamaan dan peruntukan yang diluluskan.